

Mòchen kennen de Autonomi: u'ganommen de virm ver za gem de paitrong

De Provinzaljunta, derno va de vourtschbinn van assessor en unterstützn van kennen de Autonomi Simone Marchiori, hòt u'ganommen de virm, abia ont sèll as men miast tea' ver za krieg de paitrong ver de projekt as gilt gem ont mòchen kennen s bèrt ont de simboln va de Autonomi. De mossnemm paschraip de virm bou as kearn de bandi as en de bochen as kemmen de Amministrazion bart drucken ver za aunemmen vourtschbinnen van lait enteressiert: dinstn van dritte sektor, lokaln dinstn, schualn ont learinstitutn van lõnt. No en dokument as van esekutiv u'ganommen kemmen ist, s meing de paitrong krieg de

vraibellega organisasionen ont de vraischòftn inntschrim en RUNTS, de vraischòftn, de fondazionen (auser de sèlln as zolt kemmen va de Autonome Provinz va Trea't) ont òndra innrichtn as privat sai' a'ne rif za gabingen, de Gamao'n ont de Teldergamao'schòftn, de schualn as òrbetn en de provinz va Trea't. S barn u'ganommen ver en paitrog de projekt ont de kulturalnaiekaitn gamòcht avn provinzallònt as kearn oa'na oder mearer van doin òrbetn: enviretròng ont learnen de gschicht, de kultur ont s gasètz va de Autonomi van Trentin; giltn iberhaup zbischn de nain generazioni van jungen ver za mòchen verstea' de kultur va de Autonomi, ideen, giltn ont

mòchen kennen de zoachen va de Autonomi; mòchen untersuachen ont studiarn as de Autonomi, verstea' de praich en an nai modernentn vurm. De doin òrbetn meing kemmen gamòcht pet trèffen, ausstellungen, òrbetntrèffn, musik, teatern, cinema, tòzn ont òndra artn. De projekt miasn enviretròng oa'n oder mearer van doin bèrt: zustendegkait, zòmmòrbet, selberregiar, zòmmlem pet rua, transfrontaliarte zòmmòrbet, solidaritet, sussidiaritet, sinn va identitet ont za kearn zua en a gamao'schòft, derkennen de mearsprochegkait. Schraim ont drucken piacher ist nèt an projekt as zuazolt kemmen mu'.



der Assessor en unterstützn van Kennen de Autonomi
Simone Marchiori [Druckomt PAT]

De vrog va paitrog barn miasn inntròng kemmen en de provinzalstruktur as keart en unterstützn ont bèrt gem en de Autonomi no en de virm as van bandi u'ganommen sai'. De

struktur bart u'schaung de vrog as inntròng kemmen sai' - de barn kemmen tschatzt van a gruppe va lait u'tsòk ver sèll - bart u'nemmen de ranglista van projekt as der paitrog krieg meing ont bart s gèlt ausgem finz as n hòt. S meing zuazolt kemmen de kostn ver za tschbinnen ont paun der projekt, de kostn ver za mòchen material ver za learnen, ver za mòchen reklam, ver za gem nochricht ont unterstütz ont ver de austell, ont de dinst aa, abia de bisssschòftlegen, informatik ont va nochricht rotn, verkeardinstn, grafikprojekt, auskennlaitòrbetn, tipografik, relatoren, ibersetzungkostn. [van Druckomt va de Provinz]

S Bersntoler Kulturinstitut suacht mitòrbeter

De dokumentn sai' as de internetsait van Institut. Me mias ogem de vrong vour de 27 van doi mu'net

S Bersntoler Kulturinstitut hòt ausgaleik an bando ver za vinnen mitòrbeter ver de sitzn van Bersntoler Museum. Men suacht lait as viarn de pasuacher en de museen ont en òndra trèffen as barn organisiar haier. Abia as men boast, s Bersntoler Museum ist gamòcht va mearer sitzn: der Filzerhof, de Mil, de Sog van Rindel ont s Institut. Doin jor der Filzerhof ist gaben oa'n van bichtestn heff van tol pet de sai'n zboa'sk ektarn va vèlt. Haitzegento, der museum za sechen hòt an pau pet en haus ont der stòll ver de hausvicher. U'gahenk vinnt men de milchhitt. Dernem ist der gòrtn ont umenònder de bisn. Der hoff pet de paun umenònder ont der gòrtn, ist kaft kemmen en 1992 van Kulturinstitut Bersntol Lusern. De restaurierung, vour laischiar 30 jor, ist a runt bichtega òrbet

gaben, as hot gem en de insertn lait de meglechkait za sechen ont za learnen van eltern lait de òrbetn abia as sai' a vòrt gatun kemmen: der schintldòch, der stòll, der pflòster, s haus ont òlls sèll as ist gatun kemmen van insertn hòntbèrker. De struktur van haus ont de platz van zimmer innbende, sai' laischiar gleich plim finz haizengento, asou za meing zoachen an guatn paispil va original haus. De Sog van Rindel ist a venezianeta sog ont de ist kemmen ausgarichtet abia museum ver za zoang de òrbet van holz, de sèll en bòlt ont s ma'n. Men mu gea' za sechen sa der ma'ta nomitto, en heibeger ont en agest. De Mil en Oachlait, as geat petn bösser, mittn en vèlt paut pet gatua, lòk sechen abia as s gatua en mel gaòrbetet kimm. S bösser mòcht riarn de zennreider ont mòcht gea' de milstoa' as moln



s mel. Abia èsszaig, ist a vòrt s gatua runt bichte gaben. Men hòt roken, gerst, hober tsa't ont en platz pet mear sunn tirkenboaz ont boaz. Pet de gerst hòt men kocht suppn, gamolt ist se praucht kemmen ver za mòchen der kafè. S hober ist praucht kemmen ver za gem za èssn en de vicher. En Bersntoler Kulturinstitut en Palai hòt s turch s gònze jor an ausstell as de gschicht, as de sprochen ont as de praich va de bersntoler gamao'schòft.

Ver za nemmen toal en bando van viarer van doin museen, mias men hom almen òchtzen jor, hom der auto ver za meing gea' as de òrbet, kennen òndra sprochen ont hom de meglechket za òrbetn va moi pis en schanmikeal ont nemmen toal en kurs organisiar ver de viarer van Bersntoler Kulturinstitut. En de vrog, de kandidatn miasn leing òlla de titln as se hom: de schual, de sprochen, de kursn ont òlls sèll as mechet bichte sai' ver de doi òrbet. Dòra mias men gea' za klòffen pet de referenten van Institut as barn mòchen de graduatoria, vour de 10 van oberel. De enteressiaretn za nemmen toal en bando, meing ogem oder schicken de vrog ont de dokumentn en sitz van Bersntoler Kulturinstitut en Palai vour de 27 van merz za mitto. Ver òndra informazionen mi men riaven s Bersntoler Kulturinstitut.

LORENZA GROFF

De gamao' va Garait unterstützt de studentn

De Gamao' va Garait hòt u'ganommen za gem aus an prais en òlla de jungen va de gamao' as hom se laureart. Ver za nemmen toal en de selezion, mias men ausvilln de vrog as men vinnt as de internetsait va de gamao'. Der prais ver de laurea va earste klasse ist va vinfhunderteuro, der sèll ver zboate klasse, va tausnt euro. De prais kemmem ausgem ver za unterstützn de studentn derno as se sai' noch za studiarn.

Vourstell van puach

En vrait as de 20 van doi mu'net umòchta zobenz en gamao'sol va Garait bart kemmen vourstell s puach van Elio Molter "Fersental, Opzioni 1942-'45 L'epopea di Maria Pompermaier" pet lesungen van Alessio Marchiori. Ir sait òlla inngalont.

Kulturaltrèffen en inser Tol

As de 27 van merz en gamao'sol va Palai bart se hòltn der trèff "Compartimos – un sogno chiamato Argentina". As de 28 van merz, um vinva nomitto en gamao'sol va Vlarotz, ver de kinder, "Il segreto del medaglione". En mitta as de 22 van oberel um òchta ont a hòlts zobenz en de bibliotek va Schandurschl, der leiste trèff pet "Bibliotecari per un giorno".

gamao'schòft. Der doi trèff – hòt er tsòk – ist aa de meglechket ver za padòkn se pet de lokaln amministratorn ver de groas ont bichteg òrbet as se sai' noch za trong envire.

LORENZA GROFF

Garait: trèff pet de Autoritet van sprochenminderhaitn

En mitta as ist verpai en meardinstzentrum va Garait hòt se gahòln der trèff va de Autoritet ver de sprochenminderhaitn van Provinzalrot pet de derstelln van lokal omtn ont va de Provinz. S ist gaben an trèff ver za klòffen van projekt, van òrbetn ont van probleme van insertn gamao'schòftn ont ver za veròrbetn straregin ver za gem bèrt en de sprochen minder kennt. Der doi trèff kimm gamòcht a vòrt as jor ont de Autoritet stellt vour en de toalnemmer de sai' relazion. De Autoriet ist an gupp va drai mentschn, vourtschbinnen en gasetz numer 6 van 2008. De mittoal kemmen u'ganommen van Provinzalrot, pet a mearhait va zboa drittl van konsiliar. De mittoal van komitat miasn sai' auskennlait pet sozial,

kultural- ont gasetzkompetenz. De autoritet tauert sim jor ont de mittoal meing nèt bider u'ganommen kemmen. Der komitat mias drauschaung ont konrtolliarn s sèll as kimm gamòcht en tema va de sprochenminderhaitn. De mias schaug abia as kimm praucht s gasetz, de politik as de sprochen ont as de kultur ont de projekt as gem bèrt en de doin gamao'schòftn. De mias aa zòmmleing de vrong va de gamao'schòftn ont trong sa en de omtn ont en de provinz. En trèff van mitta hom toalganommen der President va de Autome Provinz va Trea't Maurizio Fugatti, der President van Provinzalrot Claudio Soini, der Regionalassessor Luca Guglielmi, de provizalkonsiliar Walter Kaswalder, Francesca Parolari, Francesco Valduga ont



de amministratorn van tol ont va de Tolgamao'schòft. S sai' aa gaben de viareren van Dinst ver de Sprochenminderhaitn ont ausbendegen netzn va de Provinz Elisabetta Sovilla, de viarer van regionalomtn, der derstelln van Bersntoler Kulturinstitut - de Presidenten Patrizia Bocher ont de viareren Claudia Marchesoni ont de derstell van Schualinstitut Pergine 1 Marina Lasta.

Der president hòt gadenkt en de toalnemmer as de sprochenminderhaitn runt bichte sai' ont as der doi trèff ist a mechlechket ver za klòffen van insertn gamao'schòft. Er hòt aa gadenkt der projekt van PNRR. Der projekt enteressiert mear as ònders de gamao' va Palai ober – hòt er tsòk der president – de gònze trentiner gamao'schòft hòt verstònnen der doi projekt as gip bèrt en de bersntoler